

يا أم القصايد كلها



سَلِّمْتِ أَنَا

سَنَ القلم والمحبرة.. والكلمتين

وشربتِ آخر شفطتين

هايبَّلُوا ريق.. في دروب سنين

تمشي لورا بعرض الطريق

وكلام بيشهق من بعيد

كرشة نَفَس

وكان انا مخلوق وحيد

من غير ونس

باصص على الشوق اللي بان

من بين جريد

يشبه قوي قضبان حديد
بيهدّ روح متبعثرة
في بلاد تغربّ سندباد
على مركبة متكسرة
فيها الأمانى مزقّة
مّلت ساعات الدققة
على قلب يتحدى الوهن
عوده الطري أصبح جمود
يشبه جليد..
سابق عناده ع الزمن
بيقوي روح..
لساها رابطة ع الحدود
مستنظرة رجعة غريب..

من طول سفر
يا ام القصيد كلها
قربت آمن بالبدع
ليلي العنيد
مستني ضي نهار
يقيد.. يشفي الوجع
مستني ضلك يترسم
عز النهار.. يطرح قمر
ويلمّ حلم من الشتات
من بين بواقي الذكريات
فينا حاجات مستسلمة لعلوم قدر
وحاجات كثيرة بتتقسم منها حكايات
قلبين سوا ف درب الهوا

بانيين هرم

لا اتَهَزَّ عمره، ولا انكسر

يا ام القصيد كلها

ماعادش بيننا غير بواقي من عتاب

مع خوف ليصبح عشقتنا زي السحاب

لما بينزل في الفضا

مش لاقى ارض ولا شجر

ولا خيمة تحمي من المطر

لحظة لقا.. لحظة رضا

في ليالي لسه حلمها.. يطول السهر

يا أم القصيد كلها

كل الحروف وقفت طابور

طوله السنين

شايفة الكلام بيخطي خوف

نولنا الحزين

عمال بيغزل في الأذى

ويروح بعيد آخر المدى

يرجع وشايل دمع عين

رغم اننا بنفرح قوي من ضحكتين

مع كل يوم بيننا ابتدا بنقطة ندا

ما تغيرتتش من الظروف

يا أم القصايد كلها

ازاي دا عشق؟! ازاي دا حب!؟

وانا كل ما اطلع للسما.. أو آجي اشبّ

انزل بحسرة، وكسر قلب

زي الرضيع اللي اتفطم

ومألُهش ذنب
غير إنه كان مولود ضعيف
وما كانش يعرف في الألم
ولا حرّ أيام الشتاء، ولا برد صيف
ولا حسّ يوم لحظة ندم
وانت.. وانا
وبقينا نشبهه عصفورين
مالهُمش ريش
بندقي بعض بحلمنا
وقادرين نعيش
يا أم القصيد كلها
قصتنا سيرة مطوّلة
ما يحدّهاش حد الخيال

حواديتنا تحكي لبعضها

عن حلم كان كذا زينا

يحلم بحلم ما لوش مثال

مين فينا حل المسألة؟!

هو القدر كتب الوصال

هو اللي فسّر حلمنا

خلاك نجمة ملأأة

يادوب يشوفها من بعيد

قلبي أنا

عمرين طوال

أشواقنا عايشة مكملة

فيها الرضا.. فيها الهنا

صابرة قوي ومتحملة

أما الوصال

أصبح ما بيننا شئً محال

وأنا وانتِ هانحطَّ الجواب

قبل السؤال

مين فينا يقدر ع الحياة

بالشكل دا؟!!